



CKNP (2021-2023) Meeting nunung pen

To,

If undelivered please return to - TPC Office,
P.O. Box - 107
D. Phailian,
Churachandpur - 795128
Manipur, India



ESTD. MARCH 2008

MARCH 2023

Hinna Vâk

AN ORGAN OF THE TANGPAI PRESBYTERIAN CHURCH



HUNG VAK ZIANG DING KA HI TAI

- Pitin lam zuan
- Naupang Baptisma
- Khanglaite leh Nasepna

EDITORIAL | SERMON | KOCHUAM HUANG | REPORTS | SÛNNA ETC.

Editor : Rev. S. Lama Vaiphei, Executive Secretary

Joint Editors : Rev. P.B Zosapthara, Consultant
: Rev. K. Jama Vaiphei
: Rev. Th. Samuel Vaiphei
: Upa Lalminsang
: Upa S. Lalpi
: Pi Chinglalven, Secretary, CKNP
: Upa Genminlun, Secretary, CKKP

Business Manager : Pu Lalbiaklian, Office Superintendent
TPC Office D. Phailian
P.O. Box 107 CCPur-795128 Manipur
Phone No. +91 9089623251
Email - *ehinnavak@gmail.com*

Kum khat lak man : Rs. 150.00

A man pia nuam leh a la thak nuam ten Business Manager kianga hiatsak ding.

A SUNGAH THU UMTE

1. Editorial	01
2. KOCHUAM HUANG	02
3. HUNG VAK ZIANG DING KA HI TAI	05
4. PITIN LAM ZUAN	08
5. NAUPANG BAPTISMA	12
6. KHANGLAITE LEH NASEPNA	14
7. SERMON	
a) Lalpa a lunglam hawl hitiu	16
b) Maljawlna/Malsawmna	18
c) Lalpa dawt ding a pawimaw hi	20
8. LA LEH A CHANCHIN	22
9. KNP HUANG	25
11. KKP HUANG	28

Moderator : Rev. Ngurthanmawia Sailo
Secretaries : Rev. C. Lalrinliana (Sr.)
: Rev. Thanglianlal (Jr.)
Finance Officer : Rev. S. Khaikhawlam
Statistician : Upa Kaikhokam
Executive Secretary : Rev. S. Lama Vaiphei
Consultant : Rev. P.B. Zosapthara

Hinna Vâk ah thu kisua zosia hi Editor ngaidan a hi suak puai



Pauchapna Thupi:

1. Khristian Khanglai Pawl leh Kochuam Numei Pawl (Central, Bial, Branch) te nasepna a lawting jel thei na ding in pauchap hitiu.
2. Kochuam Upa leh Tual Upa te â ding in pauchap hitiu.
3. Missionary mun chuam chuam ah um te a ding in pauchap hitiu.

LAU DIAK PUI TIU

Korah chapate chun Pathian in a mite a veng hi ti a hiatchian ziak un a la siam nau a chun ***“a tui te chu gi zung zung in, phul bul bul hen la; a kinawk nasat ziak in tangte hi kiling dúp dúp ziang maleh, lau diak puai tiu”*** (Sam 46:3) a chun a la gen ui.

Tuifawn kinawk hin khawvel a etsak sek ah, i chennau khawvel hi chu a galmuang ta pua, ingat na lam lam chu a gi zung zung in a phul bul bul ma a hi. Middle East lam i thil ah buaina ngen buaina ngen in a dim ah, i kiang nai ah Myanmar gam le kumthum sung vel chu i thisan kibatpi teu haw beidawn um tak in a um tau hi. I kiang nai ua Pakistan gam te chu government a detdo leh India gam subuaitu a hui ah, a detlo khakleh thingnuaimi ten vai hung hawm in tin neuclear power hung nei leu lau um zaw chek ding tite haw hi mipil mithiam te lau chu a hi.

A tui kifawn chun tang te kiling dúp dúp ziangleh le lau diak puai tiu ti a hi kha. Tang a gen takleh mihing a genna ahisek hi. India gam vaipaw te le a buai tau ah, khawvel chu ka thunuai ah ti ziang sek USA lamte le a chawldam diak puau ah, Russia leh China te hawle a paukhau ten nau ah lungthim in a chawldam bik puau hi ti a hiat thei hi.

I Pathian thu chun, zia gual hun chu hungtung ding a hi ti a hiat zia kin, zia hun tak chuleh le lau diak puai tiu ti in ei la tilkho lawk uh a hi. Zia gual ah milian milal leh khawvel ah mi lopi pen pen te le a lau ua a kithin lai ua hin nang leh kei hin bang i thamuanpi ding a diam leh?

Pathian chu i kisel nau, i hat nau, lungdawn lai ah panpi vak ziang naicha um i nei ziak un ti hi ka dawnhuna chu a hi. Ka Hukdampa ei veng in a nai zing, lau um banggual le lau nawt ta puang ka; thigawpi leh gawpi lakin ei hum, a khutpek lopi sung ah ti a hi kha. Khawvel tuifawn chung a hin eimau tha i san lai chan ua chun tum mang ding i hui ah, a khutpek lopi sung ah thamuang tak ah i chawldam thei phat ualeh kilap sang deu deu thei ding i hui.



Kochuam Huang

1. Kochuam Piting ah lânkai thak L. Khawmunjang Branch Church Chanchin:

L. Khawmunjang kochuam hi kum 2021 in Leilon Pastor Bial ah Branch church hi ding in date 5th July ni'n Rev. Hesei Vaiphei, Bialtu Pastor in branch hi ding in a la lawmlut hi. L. Munlai Kochuam etkawl na nuai in kum 2021 – 2023 sung a um ui. Zia hun sung ahin Bial Standing Committee in aguat gual in L. Munlai Kochuam in a enkawl ua, Upa Thangkholian Vaiphei leh Upa Lalneikam te'n Kochuam piting ah lankai a hi ni tiang uh a la enkawl u'i.

KOCHUAM KISIMNA:

- Kochuam Min :
- L. Khawmunjang
- Kochuam In zat : 13
- Kochuam Upa zat : 1

- Kochuam mi zosia zat : 46
- Dan zokim zosia zat : 34
- Dan zokimlo zat : 12
- Numei zosai zat : 22
- Pawsal zosai zat : 24

L. K h a w m u n j a n g Branch Church hi Leilon Pastor Bial Kikhawmpi 20 veina, vaihawmna General (6) na chun, L.Munlai Kochuam in Kochuam piting ding ah lankai ding ah a hung dawtpi gual in, dawt piak ding in lemsak ahia, zia chu Presbytery a tut a hi.

Presbytery kikhawmpi 11 veina 2022, Jiribam Kochuam ah vaihawmna General (4) na dungzui in Kochuam piting ah lankai ding in vaihawm palai ten lemsak ahia, Presbytery standing committe in hung bawzui in, Dt. 3/2/2023 (Simhaini) zinglam dak 11:30 a.m. in Upa T. Manga, Moderator, Phaipi Presbytery in Kochuam piting ah lânkaina hun a mang hi.

HINNA VÂK

2. Bial leh Kochuam min kitianthâk dan chungchang :

Presbytery tin huap sung ah Bial min kitianthâk dan leh Bial tinte huapsung ah Kochuamte min kitianthâk dan hi mumal tak ah chiapi ding in O.M. chun a hung ngaitua ah, zia dungzui ah chun Presbytery leh Bial tinte kiang ah hiatsakna hawpdaw a hi. Kochuamte'n a lah ngaiven chiat pha'n a. Zia hi siamtup a hi phatleh, zia list dungzui ah chu Kochuam leh Bialte hi hung kitiangtha zing sek ding a hi tâk ziak in, ngaikhawk ma ma ding hi in a kilang hi.

3. KNP Kikhawmpi Lian :

A hung tung ding March 3-5, 2023 sung ahin Kangvai Bial zintun ding in, Kangvai Kochuam ah Tangphai Provisional Synod Kochuam Numei Pawlte'n Kikhawmpi Lian mang ding a hui ah, Kochuamte'n ngaiven in, pauchapnate ah le delzui chiat ding in i kichial u'i.

4. KKP Vaihawm Kikhawp :

March 10-12, 2023 sung ahin Phailianbung Pastor Bial zuntunna in, Phailianbung Kochuam ah Tangphai Provisional Synod Khristian Khanglai Pawl Vaihawm Kikhawp um ding a hi. Zia programme te hi lawk leh navak tak ah matzaw a hi theina ding in Kochuamte'n pauchapnan he zing hitiu.

5. Interserve Mission

Consultation :

A hung tung ding March 16-17, 2023 hileh Tangphai Provisional Synod Office ah Interserve lam tawh kisai ah Mission Consultation um ding a hi. Zia Mission Consultation hi lawm ni ah khen a hia, a pakhatna chu dt. 16/3/23 hileh Pastor, Pro. Pastor leh Minister te â ding bîk ah guanggal hi'ntin, a panina pen chu dt. 17/3/23 hileh Khanglaite â ding bîk ah guanggal hi ding a hi. Zia hun ah pang ding dawlte chu pangkim chiat

ngei ding ua kineppi a hui.

6. Pro. Pastor Orientation :

Kum cheng ah i la nei sek gual un, Pro. Pastor thakte Orientation Programme hi March 22-24, 2023 sung ah Committee Room, Tangphai Provisional Synod Office ah nei hi ding a hi. Zia hun sung ah resource person ding ahin hotu suan um tak tak mi 14 hial chial a hui ah, amau ah kipat in thupi chuam chuam Pro. Pastor thakte â ding liau liau ah a hung guanggal uh chu ngai thak/zil khawm hi ding a hi.

7. Pastor Retreat :

Tangphai Provisional Synod OM thupukna dungzui in June 20-22, 2023 sung ahin Tangphai Provisional Synod nuai ah Pastor semlai zosiate â ding in “Belampu Pha” ti thupi ah mang in Pastor Retreat guanggal hi ding a hi. Hun mangtu ding in Rev. PB Zosaphara, Consultant; Rev. S. Khaikholam leh

Rev. Lallarmawia, Manipur Synod te guat a hui.

8. Lay Leaders’ Training :

Tangphai Provisional Synod nuai ah Kochuam Upate â ding in Lay Leaders’ Training, a hung tung ding June 27-28, 2023 sung ahin guanggal hi ding a hi. Zia hun puitu dingte chu Upa Kaikhokam leh Rev. S. Khaikholam te hi ding a hui ah, Kochuam Upa zosiate pangkim chiat ding ua kineppi a hui.

9. Lay Workers Retreat :

Tangphai Provisional Synod Officers’ Meeting thupukna dungzui in a hung tung ding June 30, 2023 hileh Tangphai Provisional Synod nuai ah Lay Workers-te â ding liau liau in, Lay Workers’ Retreat guanggal hi ding a hi. Zia hun ah hun mangtu ding ahin Executive Secretary, Rev. S. Lama Vaiphei guat a hi. Lay Workers zosia chu zia hun a hi pangkim vek ding ua kineppi a hui.

HINNA VÂK

“HUNG VAK ZIANG DING KA HI TAI”

(Thupuan 22:12; 20)

*Rev. Summinlian
i/c Sugnu Pastor Bial*

Thumapui: Tulai ah I um nau khawvel ah nisin ah thil tung bil ah I thu hiat teu, I mit ah I thil muteu hin Lal Jesu hung kitna ding anai dan ei hiat sak hi. Lal Jesu hi hung ziang ding ah ginchakna hi mihingte thinlung ahin, alut thuk paw ma ma hi. Himaleh, ei uh ginchak leh ginchaklo thu hi Lal Jesu hung kit na ding hun hi bang ma sudanglam lou ding ahi. A hung kitna ding hi vaigei gual in kilang maleh, a thu tep kawng ah hin vaigei ngailo ahi, mizosia hi hukdam ah a um uh a dawi zia ah alungsiatna hun hi a suk sau hi ding ahi.

Lalpa Jesu hung kit ngei ding ahi:

Mitam tak te hin Jesu hungkit ding ahi ti hi a taksang puau hi. Ki thep launa mai gual in a ngai ui. A hung kit ding taksanglo te lak in humanist liberal te leh imperial liberal te hi a lang sal deu pawl te ahiu. Bible ah le Sadukai tenle a taksang puau hi. Himaleh, Apostle te thugin, Nicene thugin leh khawvel ah Kochuam lian zosia thugin in a chuang hi. Chun, Thupuan 1:7 ah chun, *“En un, ama chu sumpi khi tawh hung ding ahi, mit zosian hun mu ‘n nau, a nak ah sunte leh khawvel ah nam zosian ama chu sîn in kê in nau,”* ati ahi. Zia zia ah chun, zia khawvel ahin a ma gingtu te pui dingin, a thasang in kuama

hun sawl puan tin, ama ngei hung kit ding ahi. Lalpa Jesu hung kit ding taksanlo chu Pathian thu ginchak lona ahi. Pathian zuau gentheilo chun hungkit ngei ding kahi ati leh suailo ah ama ngei chu hungkit ngei ngei ding ahi.

A hung ding hun hiat hilo: Jesu hi bangtik leh hungkit ding ahem? Kuama’n ahung ding hun a he puau hi (Mat 24:36). Himaleh Jesu hung kit hun ding ani leh tha gen lawk chat chat pawl aum ua, ziate lak ah chun Montana leh a pawl ten kum zabi 4 ah khan Jesu hung ding ahi atiu a, Pepuza tang ah Jesu hung kit lamtua ding in a nungzuite tawh a kal tou ua, ahinla, ati gual ua ahung taklo zia in, zakcha tak in ahung

kinungle kit tau hi. Zia nung ah chun William Millar ten Jesu hungkit na ding hun a tep kit ua, himaleh amual pho kit tau hi. A hungkit ding Lalpa Jesu ngei leh van ah Vansawlchak chungnung pen in bawn a hiatlo Pa bepin a hiat chu; ei uh mihing mai mai zani apiang, tuni dam a zing ah thikit ding ho hin Jesu hung ding hun ala tep piak ding chi ahi puai.

A hun leh ni diktak he chianlo ma leu hin, ahung kit na ding hun a nai phat ah teptena ding Jesu a gen te:- kial ke ding, kido thuthang te he ding, lin kiling ding, nunsiatna nasa ma ma ding, hepina dai hiai hiai ding ala ti kha, tu hun ahin a thubep ah hilo in, I mit ngei ua muthei ding in a tung zing ta ahi.

A hungkit ni tak leh:

I Thessalonite 4:16 ah chun *“Lalpa ngei chu kiko thawm tawh vansawlchak chungnung pen aw tawh Pathian pengkul gi tawh van ah kipat hung ding ahi ngal a,”* ati ahi. Lalpa Jesu hi a guk ah hunglo ding ahi ti a ki chian hi. Lalpa Jesu hung kit ni ding hi lopi ma ma ding ahi. Ahung kit phat leh vang ki ngai tawm tak ah sabil tung chung ah chuang in hung ta puan tin, Lalte Lal, houtu te Houtu gual in hung tan tin, thik

tiang tawh vaihawm ding in hung ta ding ahi. A ma taksanglo te a ding ah chun ni lauum pen leh mualpho na tawp hita ding ahi. Lungsiatna hun tawp tan tin, gitlo bawl haisan nuamlo te a ding ah chun sual simna ding hun pha umta puan tin, vaihawmna ma ah ding ding in lalchutpha vam loupui man pui in um tan tiu in, thiamthu gen in um zia nei ta puan tin, kumtuang kumtuang ah thiamlo a chan na diu leh ka leh hagial na mun in a kumtuang mun uh mang tan’au.

Himaleh, a ma ging te a ding ah chun thiamchanna ni leh lopina kumtuang ah a chan ni ding uh hi tan a. Zia ni chu ni kipak um pen hi ding ahi. A ngak la ma mau Lal Jesu tawh meltak ah aki mu tua ni hi tan tin, Lal Jesu’n ama a ding ah mun a siam piak na mun chu zuan in chia tan tin uh, Pathian hausakna go zosia lua ding in kumtuang inpi ah chun pui lut hi tan nau. Kumtuang bukimna mun ah chun guatchuam choihoina lal lukhuk Lalpa’n a guat chu chang tannau. Zia khawvel natnan a tuam dimna, ki itsik tua na, duamna leh mani masialna mun leh diktak ah hinkhua mangte a ding ah vakvaina khawvel, diklo tak ah

HINNA VÂK

khawsa te a ding ah dindawna khawvel hi nutsia tai tiu.

Kiging zing ah um a poimaw hi:

Lalpa Jesu hung ding hun I hiat chian lo ziak un, Lal Jesun kiging zing in um un ei ti ahi. Tunin ahung thei a, tuzan in ahung thei a, zing leh ahung thei a, kalkit/thakit/kumkit inle ahung thei zing hi. Himaleh, mitam tak te hin hung kit ziang ding ah I ginchatlo ziak un, I ut dan dan un I um ta sek uh ahi. Bangchan khawvel ah I dam ding bawn hiat chian hilo, duam tak in hun I mang ua, nekgukna, zawntatna, gukchakna leh thil sual zat chuam chuam bawl nan I hun teu I mang sek uh ahi.

Billy Graham in a damlai ah a thu gen khat chu, “Zan ah kalup ding kuan leh ka ngaitua sek chu tuzan Jesu hung ta leh bang ati diam, zingkal ka tho phat leh tuni leh Jesu hung ta leh bang ati diam?” kati sek hi. Zia gual lung gel hi tulai ah Kristian te hin nei vek leu hin, gitlo bawl na ding in hun ki mang ngam din ka gingcha puai. Ahin la zia gual lung gel chu I neilo ziak un gitlo bawl na ding in I hun tamtak uh I mang sek uh ahi.

Hun nunung chu ahi tak zet tai ti hiat ding ahi, khawvel a

changgang deu deu a, buaina a pung deu deu a, doctor thiam tam deu deu natna chi chuam chuam pung deu deu, mihausa pung deu deu, himaleh lungawina nei tawm deu deu, lungthim lam ah haksatna nei tam deu deu hin hun nung ahi tak zia a taklang hi. Pope John Paul chun, “Zing pha hi um thei ding in ka gingcha ta puai,” ati hial ahi. Zia ziak ah chun Bible in, ***‘Ngaichang zing un bangtik hun ah ahung ding la he puau hi’ ‘Thiangtho tak in um zing un’ ‘La Pathian tuak ding in kiging zing in um un’*** tin ei zilsak hi.

Thukhakna: Lalpa Jesu hi zia khawvel ahin hung kit ngei ding ahia, ahinla ahung kit ni leh dakkal ding hi Pathian tilo kuaman a he puau hi. A hung kit hun hi lopi ma ma ding ahia, ziani chu ama taksanglo te a ding in zachatna leh mualphona ni hin tin, ama taksang te a ding ah chun ni kipak um leh lopina a chan niu hi ding ahi. Lal Jesu hi hung kit ngei ding ahi ziak in, a hungkitna ding ah kisak lawkna ding ah pha pen chu piangthak nailo lahi leh Jesu la Lal leh Hukdampa ding in pawm inla, piangthak ta lahi leh Pathian nasep na ah thei tawp sua in pang in.

“PITIN LAM ZUAN”

(Hebraite 6:1-3)

~ Rev. Thangtinlal Suantak
i/c Jiribam Pastor Bial

Hebrai gingtute kiang ah tilkhona thucha pawimaw tak ahi. Tulai gingtute a ding in le thucha pawimaw tak ahi zing hi. Piting ti chu he kim ta, ahi na ding hi ta, ti na ahi mai ah, piting zia genchian na ding in Naupang zia gen masa hitiu.

Piting leh naupang zia kum tam leh tawm thu ahi lo dan lawi leh pai lak ah le piting leh piting lo hiat thei na hun ting a um hi. Ei sang ah kum lam ah naupang a mizia ah piting a um sek ah, zia gual ma chun kum lam ah upa zaw a mizia naupang zaw a um sek bawk ahi. Zia gual ma chun Kochuam huangsung ahin le kum lam a upa tak thagau lam ah naupang a um a, Pathian nasepna lam a le sawt tak a la sem ah experience nei, maleh thagau lam leh Kochuam kivaihawmna lam ah naupang gual mai kingakna tâk tak tak hilo a um thei hi.

1. Kochuam mit ah naupang zia te:

Kochuam huangsung ah thagau lam ah naupang zia khenkhat vak taklang hitiu.

i) Kochuam sung ah thu kikal deu ahem a um phat leh Nuak, Kithada, Lungawilo pai jiang sek.

ii) Naupang in ama chau ah um haksasa sek ua, midang a mamaw sek gual in gingu

midang a kinga sek mite chu naupang zia ahi.

iii) Pathian thutak sang in a phul um leh nek leh dawn lam ngaina sek te.

iv) Thêp lungawi ngai zing, a lungawilo khak ding, a kithâda khak ding etc. vên ngai zing leh a thil bawl ding leh bawl lo ding genpiak zing ngai te.

v) Dik leh he kisa, midang

HINNA VÂK

in bang gual ngaituana a nei diam ti ngaitua lo hial ah ama ngaidan leh ngaituana chau gen pawp pawp ziang te

vi) Masawna ding ah mathîlna leh guanggalna bangma nei ngai lo te.

vii) Dawtheina nei lo, ngak ham ham pei lo, bawl ham ham pei lo te.

viii) Mawpuakna ngai pawimaw na chang helo te.

Thil dang tamtak genbe ding um in ah, zia I taklat nau apat hin thagau lam ah bang gual ah piting leh naupang ihi mimal tin in ki ngaitua zui mai di hin ah.

2. Piting zia khenkhat te:

Mi piting leh piting lo hung kihiatdaw sekna pen chu lungthim putdan leh thil ngaipawi dan apat ahi sek hi. Mimal leh Kochuam leh akîm vel vak thîl le chun hiatthei tiang bang ahem zat a um mai sek hi. Tam tak gen ding um in ah, khenkhat chau gen hi tiu.

i) Mi piting chun dawtheina leh thokhatna a nei sek hi- Dawtheina leh thokhatna mat

a pawimaw hun chu haksatna leh thil buai um tak tak I tuak phat leh ahi sek hi. A hun tak ah mat ahi leh a tawp ah kipakna ahi sek hi. Lalpa ziak ah midangte ding ah nêk ding gadawk sektu chu ginna ah mi piting ahi zia gual gadawk thei ding a chun dawtheina leh thokhatna hi I pawimaw ahi.

ii) Mi piting in ahi na aki hiat sek hi - Nu le Pa te hi chate gual in um hen la, a thil daw u dawn in kiphin u hen la hung nuak vel sek le'û kilawm lo ding ahi, Mi piting chun ahi na ah mawpuatu leh a sem ding pen ahi ti a ki hiat a. Enkawltu pen ahia, Gua leh dai kai hen la, vawt in lum hen la, haksa in nuam ma leh a sep ding chu a sem mai sek hi zia chu midang a ding ah a lul in a pha chuam ma ma sek hi, zia gual lungthim chu I put chiat ah, I hi na leh mawpuakna mualsua thei chu Lalpa a ding a mat tâk, kingak na tâk I hung hi ding ahi.

iii) Haksatna in a dal zo lo-haksatna bang ahem a um phat leh pêtkawi san mai a awl sek ah. Gingtu piting ginna

det leh to chu haksatna hung um te ziak a chu a kiling ngai puai. Zia gual ah haksaknate petkawi san leh haisan mai lo ah bawl ah mualsua sek mi chu gingu piting um dan ahia, zia mi chun ga dawium tak kipakman mu ding anei sek hi.

iv) Hepina nei - Lal Jesu khan hepina ziak in thil tam tak ei thokpiak ah, ei seppiak ahi. Midangte taw I sepkawm na mun ahin a hat deu te, a zawngkhal deu te, a thiam deu te, a thiam thei lo deu te, kawhe deu leh khaw helo deu te taw sepkhawmna ahin hepina tawh ahi lo chun ki hawmthawna leh kidawi khop lona ziak in sepkhawmna a sia thei ahi.

3. Mawpuakna sukpitin hi pitinna ahi :

Khawvel ah hinna nei zosia hi a khan di gual tak ah ahung lo a, ahung piting zawlo phat tak leh ahi ding bang hi zo lo chu ahi. Gingu hinkhua ahin le a piting ding gual ah piting zo lo chu nungtawl a hi mai sek hi. Zia ziak chun Pathian

a mi Kochuamte chu mi ki banglo ngen chu khat leh khat kipanpi tua ding in a Kochuam ah zia te chu thagau ah thilpiak chuam chuam mitin kiang in a piak thu 1Kor.12:4-14 ah I mu ahi. Zia, mitin te chun a mawpuakna chiat ua ginum tak ah a hung sep piting phat leh Pathian Kochuam te chu thagau malsawmna dawng in masawmna leh khantona ahun hi sek hi. Hin la gingu te lak ah khenkhat chu midang chung a kinga , midang in a bawl lo ziak ah, ki thugualpi ding um lo ziak te, lawi leh gual pang lo ziak ah mawpuakna supiting thei lo chu pitinna na lam zawt malak sang in gitlo kipatna leh nungtawl um dan ahi zaw sek hi. A ziak chu Pathian in Kochuam te mang in mitin ama taw kituak chanvo piak ahia ah, zia mawpuakna supiting lo chu ama hinkhua ah masawmna umlo chau hilo in midang zawngkhal sak tu ahi sek hi.

Gingu pitinna lam zuantu chun a ma ah um mawpuakna a mualsua sek ziak in zawna

HINNA VÂK

lopi tak chang gual ahung hi sek hi. Zia mi chun a nasepna a mualsua ziak in hansanna a nei sek a, mite ngaisanna, ngainatna, zaumna leh mite muanggam hi in, ama pitinna lam zawt chau hi mai lo in Kochuam, khawtang leh insung ah mite a ding in pitinna ahi ngal sek hi.

4. Piting lam zawtna ding khenkhat te:

GINNA lam ah leh Kochuam hinna ahin pitin lam I zawt zel na ding ah gen ding tam in ah,neukhat vak gen hitiu.

i) Kochuam aw hi Pathian aw ahi ti thei zing hi pitinna lam zawtna kalbi pawimaw tak ahi.

ii) **Pathian biak/ho** - Pathian I biak/ho na ah leh Ama taw I kinai dan kibang vek khel pua ah, Kochuam, sungkuan leh mitin in I Pathian biakna lam ahin masawtna ding ki nei tam ding in ginchak a um hi. Kihona I ti phat leh kingaithak tua ahi sek ah, Naupang in le a nu leh pate a hopi phat leh ngaithak ahi sek gual in, I dawu chau dawtna mang

lo in Pathian aw le hiat guat ah Ama tawh kiho tua zing hinkhua nei ding in piting lam zuan hitiu.

iii) **Thilpiak ah** - Pathian kiang ah piak ding lul pen chu I hinna' u hi ahi, I hun, I sum leh pai, Lalpan ei phut gual ah sawma khat I pia dik sek nam? sawma pakua I mat dan apat hin masawtna inei na em? Ahi lo leh Naupang thil kikawlsak I lak kit guat phat leh phal ngai lo gual in I um sek em? I hinna leh I sum leh pai zosia hi pathian a ngen ahia chawmcha ei vak kawlsak mai ahi zawi.

Atawpna'n, Pitinna lam zuan ah I chia zing lai ua hin chia laklaw lai tak haisan lo , I ginna' u siamtu leh bukimsaktu Pathian lam chu en zing in Pitinna lam zuan zel ding in ginum leh thokhat tak ah kingaitawmna lungthim taw Lalpa mattâk gingu I hi thei na ding in piting na lam zuan in Lalpa nai hitiu. Lalpa'n a thu malsawm ta hen. Amen

“NAUPANG BAPTISMA”

(Rom 6:1-11; Gal. 3:26-29; Col. 2:12)

~ Rev. S. Lama Vaiphei
Executive Secretary

Thumapui : Baptisma hi a til a kipat ah Pathian Kochuam te chun Lalpa Jesu thupiak a hi zia kin a ngaikhaw k ua, gingtu taphawt in baptisma a la chang sek uh a hi. Vaiphei Khristian history hi i et a hi chun Pu Sap Tangval kha Mizoram ah hung kipan in Kochuam a hung din ah, Presbyterian a vua pawna chu Presbyterian form of government in ei la kaihuai uh a hi. Ginna leh thugin chiapi dan ah le Presbyterian thugin chu i kibulphunau a la hi. I tekse teu haw kha nausen lai ah baptisma chang ngen a la hui hi.

1. Bang zia k ah Naupang Baptisma kibawl a hem? uh a hi.

I Bible a hin baptisma chang ding kum zat bithiakna a kimu puai. Gingtu masa te khan Juda sakhua sutzawpna dan ah ngai in, thil bangkim hi Juda sakhua dan tawh kitawn zelin a la chiapi ui.

Zektan dinmun kha baptisma hin a lua hita ah ngai in a cha leh nau teu nigiat ni ah zek a tansek ua, zia chun Judami ahina leh a sakhua ah namdetna in a ngai sek ui. Khristian masa te khan le zia dungzui a chun a cha leh nau teu chu Khristian a hi ti hiatsakna ding in nausen lai in baptisma a la chansak sek ngen

Kochuam masate chanchin kha i et a hi chun, Lydia te sungkuan baptisma chan thu (Acts 15:15) i mu. Zia hin kum bithiak genlat a um pua a sungkuan un a chang ui ti hin nausen nawicheplai tele a huam ngei in a pawm thei hi. Philipi suangkul vengpa te sungkuan baptisma chan thu (Acts 16:33) i mu kit ah, Stephenus te sungkuan baptisma chan thu (1Cor. 1:16) mu in a um kit baw k hi. Zia hin a suklat chu a nu leh a pa te ginchak Pathian chu a sungkuan un a zui ua, a sungkuan ua khan zia ding a chun a kipumpiak ngal mai ui

HINNA VÂK

ti a suchiang a hi.

Lalpa Jesu khan naupang te a ngai pawimaw ma ma ah, zia tawbang mite â ding ah hi van-gam chu nai zaw hial in a la gen a hi. Piting lam te bep ngaikhawk Pathian a hi pua, naupang neucha chate haw le hepi ah, a kiang ah hung ah malsawmna penuam Pathian a hi.

2. Naupang baptisma chu banggual ah bawl ding?

A nu leh pa a hem, a enkawltu ten mawpuakna lan tiu in, a gin ua a nung a zui uh Jesu kengbul ah pui in; zia nausen ngei chule Khristian ah a siam ding uh a hi. Nausen chu lampi dang ah a petlona ding in kaihuai in mawpuakna a lak ding uh a hi.

Tichun, nausen chu a hung khanlet ah sia leh pha hiatna a hung pitin hun takleh Confirmation bawl ding in biakin ah a puikit ding uh a hi. Zia hun a chun naupang chun, ka nu leh ka pa ten Khristian hi ding ah eila pulut uh hi keima ngei in pha ka sa, ka pawm in ka nemdet hi ti thutiam a la ding a hi tina a hi chu.

Zia tak a hin, nu leh pa ban ah Kochuam in mawpuakna liantak a nei belap a um ah, zia chu Sunday School phatak nei, naupang te a mau kumbi tawh kituak ah zilsak ah kaihuai ding a hi. Kum 14 a tin ua hin baptisma Course zil in tin uh, baptisma umzia leh a thiltup te pha tak ah a hiatthiam uh a ngai hi. Tichun confirmation chu fel takin chia tha ta ding a hi.

Thukhakna :

Kochuam mi hingal ah a chate nausen ah baptisma chansak nuamlo chu thildiklo tak a hi. I Kochuam hin Kochuam masa te bawldan kha zui pek in bangkim a pha thei ding pen ah i chiapi a hi ti hia in, nu leh pa te gingtu phatak a chateu gingtu teptena zektan ngamlo nu leh pa hilo ding a hi. A mau a hung pitin uh i ngak ua a hi chun, kei chu Khristian ka hia, ka chate chu a hung pitin ua, a nawp uhleh Khristian ah um in tin uh a nawplo ualeh a mau thu thu tina mai a hi. Naupang te haw tawh sungkuan kim ah Khristian hi ding leh sungkuan kim ah van khawpi lut ding chu tup pipen in nei hi tiu.

KHANGLAITE LEH NASEPNA

~ P/P Lamgoulian Hatlei

IKochuam in a siam Khristian Khanglai Pawl Kikaihuaina bu chun Khanglaite hi kum 14-40 tiang a la huap sak ah. Zia gual ma chun United Nations, (khawvel a kivaihawmna lianpen), in le khanglai hun hi kum 15 – 25 tiang in a la khen kit hi. Zia kipat I mu thei chu, khanglai hun hi chu naupang te leh piting te kikal ah hunbi pawimaw tak, i tha hatlai tak leh I hisel laitak hun haw a kawc deu pen hi. Chuleh, Nasepna I ti chu lungthim leh taksa senna thei a thilbawl ahia, zia chun sum leh pai hem, a gasua um thei tei tei ding a thil bawl lam a genna ahi. Ziaziakchun Khanglai hun hi hunbi pawimawtak leh nasep hun ahi ngai ahi. Khanglai hun a hin ei siamtu hi hetzing ah, Pathian lopina ding bep ah hun leh nite mat hi kul leh pawimaw ahi.

1. Khanglai hun hi nasep hun ahi : Thugentu chun *'Van nuai khawvel ah thil zosia a dingin hunbi leh a hun a um chiat hi: Pian hun a um ah, thi hun a um hi; phu hun a um ah, bawdawk hun le a um hi;'* a la ti a hi. (Thugentu 3:1-2). Zia dungzui a hin, khanglai hunsung hi hun chawmcha bep ahia, zia hun hi 'phu' hun diktak chu ahi. 'Phu' hun ti hin a gennawp pen chu 'thaichi' mu hi lei ah tu a, a ga hung sua thei ding ti genna ahi. Zia hin nasepna chia tha zing ding ti a kawc chian kei hi. Hun zosia'n le thaichi hi phu thei diaklo ahi, a hun um ahi.

Nelson Mandela ngei khanle 'Tuni khanglaite hi zing

hun a puitu te ahiu,' a la ti gual in khanglai hun hi zing dung thai dung ah pilna leh thiamna I nei theina ding ah nasepte kizil hun ahi. Ziaziakchun, Khanglai hun hi hun man tamtak, nasep hun, kumtam tak a hung chia phat le I nasepte a ga I luak theina ding ah kisinsak na ding ah hun pha chu ahi. Khanglai hun ah I phu lo chun hun dang kinei ta lo ahi. Khanglai hun hi nasep hun chu ahi.

2. Khanglaite a din nasepna chuam chuam a um hi : Nidanglai a khan khawvel a la masawn tak tak nai pua, sep leh bawl di haw le a tam bek pua. Zia lai ah sep ding um sun te chu, zingkal thaw vak ah, in na

HINNA VÂK

sep te, lokuan te, gam vak haw, gan gual etkawl haw a la hideu mai hi. Himaleh, hun a hung chia zel ah, tuhin I chenna mun teu haw le khawpi a hung suak zo ta, sep leh bawl di haw le a hung tam hiai hiai ta, in mun lo mun leh in kiang nai cha cha haw'n le nasep na ding mu thei ahi tai. Tuhun ahin mizosian, nasep ding haw I dawi gual gual un, ei ma chemchawina lam chiat in I chia thei tau.

Mi tamlo cha te Pathian nasem ding ah a hun pumlum ua kipe dawk le a um ta'n. Mitam takte tuhun ahin sorkar na sep ding le i hung mu thei tau a, zia a hi zinglai chun khenkhat in huan lian tak tak leh tuilo te haw I enkawl thei nalai u'i. Khenkhat in gual siak kidemna (Games & Sports) lam haw'n le dinmun (career) hawi tak tak haw le a hung nei thei tau. Khenkhat chu insak thiam mama le a hung ki um tai. Zia khel a chun le tam tak ten, kawl gam vai gam in sepna chuam chuam a ki bawl thei ta'i. Tuni hin I et veng veng ahi chun, khanglaite haw hin nasepna a um thei zosia chu I semsuak tau hi in a kihe thei hi.

3. Khanglaite'n I sep taphawt uhi Pathian lopina ding bep in sem hitiu :

Khanglaite'n Pathian malsawmna I dawng ua, nasepna chuam chuam te I sem thei ua. Bang gual na sem leu hinle, a pawimaw pen chu I nasepteu leh I panmun te mangcha thiam in Lalpa a dinga bangkim I sep zawk sek diu ahi. I Bible in le '*La hi tapo uh thugen a hem, thil hi a hem, ama ziakin Pa Pathian kiang in kipak thu gen in, Lal Jesu min in hiu in,*' (Kolossa 3:17) a ti a hi. I umna tapawt ua Pathian a ding a palai ginum I hi lam uh I kihiatmiat seklo ding uh ahi (2 Korinth 5:20). Palai ginum I hi theina ding a chun I nateu hi Lalpa I kawlsak ding uh ahi, zia lungthim hi I put hun ua chun Pathian lopina ding in sem thei ta hi tin u, malsawmna le dawng ngei ding I hiu (Thupilte 16:3).

Na chuam chuam I sem ua, na chuam chuam I enkawl u'i. I nasep te'u hi Pathian lopina na dinga tam tak in I sem thei ua, Pathian in ei kipakpi ding le I ngak la mamau hi. Ahi vang in, khenkhat in amau lunglutna lam tak in Pathian dawilo gual nasepna a la bawl khak sek ziak un, a nasepnau a chun Pathian in mun a nei ta puai. Na chuam chuam I septe'u hi Pathian lam ei nai sak tu ahi em? Pathian lam ah ei puimang tu ahi zaw em?

LALPA A LUNGLAM HAWL HITIU

~ Pi Thianneilian @ Th. Ashi Vaiphei

Amasa'n simtu zosia Kumthak CHIBAI ka hun buk hi. Banggual lunggel tawh kumthak lut i hiu em ti kuama i kihetua puau. Himaleh, i lunggel un vang tup nei chiat hitiu ti taksan aum hi. Taksa khawsak ding ngaituana ziak in, kumlui ah i hun mat dan sang ah thupi zaw ah lawtin gua'n guanggalna nei chiat ding ihui. Manthai ding nuam kuama ium lo gual ma'n lawtin i gaw chiat sek ui; lawtin guatna zosia'n kipakna aum diak puai ti hezing kawm in i thupi hih ngaitua thak leu hin ka nuam hi.

Sawlchak Paul in Ephessa mite lekha a la thawtna chun, *"Ziaziakchun, ngawluhai tak in um kiu inla, Lalpa lung lam chu hawl in hiatthiam gaw zawu in."* (Ephesa 5:17) ti a la gen hi. Bangkim guanggal in khawsak theinapa ngaitua maleu hinle, Lalpa lunglam hawl ah hiatthiam gua i hilo ua leh, taksa i ngaitua dang te chu a thupi pen hilo ding ahi. Ziaziakchun, Lalpa lunglam hawl ah hiatthiam i guat chuh thil pawimaw mama a hizia a kilang hi.

I nutsia Kumlui ah la hinkhua mat dan vak nungthil kit leh chun, Lalpa lunglawhawl ah hun la mat dan leh la hun chiasa thilpha la bawlte hedawk mai ding la hi. Ziate khan malam kinepna a

piak ziak in la kipak mama sek a hikha. Ahi'n, Insung, Kochuam leh Khawtang hinkhua ah kinakna ahem, kikhenna ahem tunsaktu la la hileh vang, lei taksa ah siamphat kit thei hitalo di'n Lalpa'n zia kum kha a la seltup tai. Hunkhat ni leh hun puangdawak kit ding ahia, mite chun "kap in hagial in ni maleu hin, nang ni aum nawt puai eila ti'n au" ti la'n i sau. Bang ziak ah ziagual lawm ah kisikna hih hung tung ziang thei di a diam ti'n i la gel maithei hi. Unaute, Lalpa'n kumthak ei piak te a lunglam hawl na leh a dawigual hiatthiamna i la matlo ziak hitei ding ahi.

Mi hausa khat hin chapa khat a nei in, a mamaw zosia bangkim a chawk piak un, taksap bangma

HINNA VÂK

a nei ngai puai. Anu leh Pa chun go lul tak ah a nei uh ahia, Ama ziak ah malam kinepna tamtak le a nei ui. Himaleh, a inn ua a umpi'u a suaknu chu a chapa'n ahun lungsiat mama ziang ta, Anu leh Pa kinepna gual vang a hita puai. Nikhat chu, Anu leh Pate chun a umpi'u Nungaknu chu a chapa hiatlo in thiammaw nasatak ah chan in a sawldawk tau. Nungak nu chu a thase mama ziang in, maleh, a nial theilo ziak in Apa kiang lam in a chiakit tai.

Nikhat chu, mi hausa mama pa chapa chu, a sepna apat suty ah inn lam ahung pawt leh, mukâl a ngakla mama a inn ua um Nungaknu chu a muta pua, Anu leh pa'n a la nawdaw uh a hidan a hiat phat in Thingtâng lam ah a la umpi'u Nungaknu inn chu hawldawk in a chiatai. Theitawp sua'n apa lung a hawl in, a dawisakna a dawn theina di'n Kawlbu-lei a tho in, Bawng-an te a siampiak in, a gilkiat mama hun leh Bâlbut kihuanthe chu a nemai sek hi. Gentheina a la hekha ngailo tangval chun, a lungsiat mama a neina di'n genthei tawpkhawk a tuak in, himaleh, lungthuai diak lo in a lungsiatnu pianna pa lunghawl

chu a sunzawm zel hi. Nikhat chu, a lungsiatnu pa chun a lunggel ahun sangdanglam ta, ziagual lawm ah hausa, a lungsiat khat a channa ding ah gentheina tincheng thawk khawk salo tangvalpa chu a hepi mama ziang ta'n, a daw chu pitin sak tei a gawta, tichun, amau pacha'n tawh ankuang khat sawkkhawm in a insung in a ngam sak ta, dawt ding ah kilawm zosia a dawt zaw in a chanu chu a damsung zi di'n a peta ahi.

Eima dawidan bep ah khawsa i hiu chun, lawk i kisak ni um intin, tuang mama ah i kihiat ni'u le umsek ma ina. Himaleh, Lalpa lunglam hawl ah hiatthiam gua i hilo ua leh vang, damsung bep hilo, i thagau hinkhua tiang ah kipakna mulo ding ihiau. Lalpa lunglam chu hawl in hiatthiam guai tiu; ziachu i kinepna bukim saktu hi ding ahi. I guallel hun um intin, i gualzaw hun le um ngei ina. Bangkim chu Lalpa tawh mang thei leu hin, a lung hawl na leh a dawigual hiatthiamna chun bukim ngei hitiu. Lalpa'n simtute zosia, a lunglam hawl ah hethiam theite hidi'n ei malzawl piak ta hen! Amen.

MALJAWLNA/MALSAWMNA

(Thialsiamthu 12:2-3)

*Pi Kh. Thianniang
Treasurer, CKNP*

Khristian labu No. 36 na chun hiti hin imu, *“Malzawlna la dawn hi sim le chin, Amin tiam in a ban in sim in; Pathian in ahun piak zosia hi; Maksa tak in Pak zing in la-a petu.”*

Malzawlna kuama sap in dawn aki nuam chiat a, maljawlna idawn theina ding ah chun eile midangte a ding ah maljawlna ihi apawimaw hi. Kumthak Pathian hepina zal liau liau in lankai in i um ua, a mudi mawng ka hi iti khak chun gel khial maithei ihu. Pathian hepina zia ah mu bep ka hi ti lunggel nei angai hi.

Abraham kiang ah Pathian thutiam hi alopi ma ma ziang hi. La hun chia tasa lamat dante kha vak nungthil tia midangte a ding in maljawlna la hi nam? Pathian in Abraham kiang ah a tiam hi nang leh kei kiang inle ei tiam piak ve tho ahi. Damsawt nate chan in ei tiam ahi. Gingu Pathian thu awite chu maljawlna chi chuam chuam Lalpan atiam a hi.

Lalpa'n ei kona pipen chu, ***“Nang maljawlna hung hitan,”*** ti hi'n akilang hi. Gingu te hi khawvel/mite ading ah maljawlna ihiu chun Lalpan ei umpi ngei ding ahi ti Abraham hansia law tapo chu hansia law ing ka tin a maljawl tapo chu maljawl ding kahi ti'n atiam ahi.

Khristiante hin athak in ngaitua leu hin ti ah ka dawi chu midangte ading in

banggual in maljawlna la hi em? Nasemtu/Rawngbawltu midangte ading ah maljawlna ihiu hi adawi um ma ma ziang hi. Khenkhat chu midangte a ding ah maljawlna hi malak sang ah asu na tu leh hiliamtu le ki hikha thei ahi. Gingu Pathian chate hin Committee ah ipan khawmpite a ding ah le maljawlna ihi a pawimaw hi. Panpi ngaite panpi, ahe lote hetthiamsak aneu pen

HINNA VÂK

chung ah la bawl hi keima chung ah bawl la hi Lal Jesu'n ati ahi. Matthai 7:12 ah chun, *"Nangmau chung ah min hileu ti la dawi gual tak un, nang unle michung in bawl un"*, ati gual in bawl leu hin midangte ading ah maljawlna kihi thei ngei ding ahi.

Unau tuni hin ngaitua thak hitiu, bangpen ahem midangte ading ah maljawlna ihi thei sek lo ziak, eima ah daltu umsek melmapa setan thuneina paitha in midangte ading ah maljawlna hitheiding in Lalpa'n athu thiangtho l chanding chiat un ei maljawl piak ta hen. Amen

ADVERTISEMENT

Manipur Presbyterian Church Synod Theological Education Committee guanggalna Synod Bible School batch 10na (2023) chu April 14, 2023 1:00pm ah Synod session hall ah hawna nei ding a tiu ah, zia Synod Bible School ah kai nuam Kochuam mi leh sa a um chun, March 20, 2023 tiang ah Tangphai Presbyterian Office ah hung pelut ding in ka hung hiatsak hi.

Zia chungchang ah hiat ding pawimaw khenkhat zia a nuai ah gual hi a hi –

1. Tangphai Provisional Synod apat mi panga (5) tiang lak thei hin a.
2. Admission Fee ₹500/- (*a sawltu Kochuam in a piakpiak ding*).
3. Lekhabu man ₹450/- himaleh a kâi dingte bep in Rs. 300/- in chaw thei inau.

“LALPA DAWT DING A PAWIMAW HI”

(Thupilte 3:6)

*Pu Jamkhawpau
Lingsiphai*

“La lampi zosia’n Ama dawng zing le chun, Ama’n la lampi ding hun siam zan piak in a”

Lalpa’n kumthak 2023 ei pui galkai kit ta, kumthak hin bang thil ei hun tut ding a h’em ti kihelo a hi. A nuam tuak ding i he’m? A haksa tuak ding i h’em? ti him him kihelo a hia, ziaziakchun, bangkim kimaituapi dan i thiam theina ding a chun Lalpa i dawt zing a kûl a hi.

Hiatlo gam ah khualzin gual i hiu : Hiatlo gam ah khual i zin leh, i masang ah bang gual tuak ding i hem kihelo hial a hi. Lam haksa banggual haw ding i hem , lam suk lamto bang gual, guam leh tang bang gual kân ngai a hem ti kihe masa mawng mawng lo a hi. Ziaziakchun, i gammanlona ding in a heding dawl mi i mu mu a ban in i dawng malam pek sek a hi. Zia gual ma chun, kum 2023 ahin le vangphatna tuak ding i hem, vangsiatna, nat leh sat, kial leh châk, thi leh man bang sikha ding i hem ti him him kihelo a hi ziaikin, a hung tung ding hetu Lalpa i dawt zing ding uh a kûl a hi. *“La ma’u in hinna leh thina, maljawlna leh hânsia lawna ka*

kawi hi”. (Deut 30:19) a ti gualin a nuam leh a haksa hung kihel to zel ding a hi ziaik in, i kiginlawk ah kimaituapi dan i thiam theina ding in Lalpa i dawt zing ding a kûl tak zet a hi. Israelte kiang ah khan le, “La chiana dingu hi la chia khak nailonau a hi ziaikin chingthei tak in um un” ti in a hil a hi kha. Ching theilo leh kivenglo ah i chia a hi chun chuanpel/bawkhial kha ding ihi ziaikin chingthei tak ah Lalpa dawng zing kawm ah kum 2023 hi matto gua leu hin ti i nuam uh a hi.

1. Lalpa i dawt chun, Lalpa’n i lampi ding ei hil ding a hi :

Sam 32:8 chun, “La chiana ding lampi chu hun kaww mu in, hun hil ing ka tin; ka mit ah hun entha zing in, lem hun

HINNA VÂK

guat piak ding ka hi” a ti a hi. Lalpa i dawt zing ah Ama’n ei hil ah lem ei guat piak a hi nâk chun, i siatna ding leh i manthaina ding lem ei guat piak ding chu ginchak umlo hial a hi. Ei un Lalpa i dawng sek pua’u ah, Ama lem ei guat piak ngaklo ah, ei ma’u nawp dân dân leh ei ma’u phasak dân dân ah i chia khak sek zia’k ua, siatna leh buainate tuak kha sek ihi zaw’u a hi. Ziaziakchun, 2023 kum i matto zelna ding ua hin, Lalpa dawng in, Ama lemguat piakna dungzui ah kal suan zaw leu hin bawl khiallo ding ihiu.

2. Lalpa dawngte chu a lawsam ngai puau hi:

David kha Lal Saul lau ah a jam vel vel lai a khan, kiltin muntin in a kisêl vel vel ah, a tawp in kisel suakcha zo ma ma lo ding ah a kihiat phat in a melma Philistine Lal Akhish ava bêl ta, Lal Akhish tawh kithua ah gal a bawl vel vel kal un, ama umna khua Ziglag kha melmate’n ala bulu ua, mei in ala haltum piak ua, a zi leh a chate’u, a ganचा te’u leh a nei a lam zosia’u ala puak mang piak tau a hi. Ziaphatachun, David in Lalpa a dawng masa phawt ah, **“Zia pawlte hi ka delzui diam? Ka**

delpha nalai diam?” ti in a vak dawng masa a hi. (I Samuel 30:8) Lalpa’n le a mit ah en in lem a guat piak ah, kintakin chia theng leu del phak ding le hitalo maithei ahiu a. Himaleh, Lalpa lemguat piak dan mak tak chu, In tung nailo lampi kâllak tak in a gallâk uh zia’k ah kipâkna nunnawp ala mang ua, khawmu khawchang helo hial ah a um laitak un, David leh a pawlte chun a del pha’u a, a va do ua, Lalpa thu gual ngei in a khut ua kipat a va hukdawk siksek tau a hi.

Peter khale Lalpa’n, “Lithûk lam zuan inla, sanga man ding in la lên sep in” ati a khan Simon Peter in, “ Lalpa gim tak in zankhua’n ka pang tau in bangma ka man puau hi. Himaleh, la thu’n lênte sep kit ing ka” a tia. Lalpa thupiak gual ah lithûk lam zuan ah a lên a vak se phat in gen guallo khawp in a lawting a hi kha (Luka 5:4-6)

Ei uh le kum thak 2023 i matto zelna ding ua hin, Lalpa dawng zing ah Ama lem ei guat piakna gual ah hunte mang to ah, kum huitung ah lamzang tak ah kum 2023 hi mang tum thei chiat ding in Lalpa’n simtu zosia ei maljawl chiat ta hen.

Amasa'n i Chanchinbu uh dawî um tak Hinna Vak Editorial Board te'n "La leh a tuanthu" ti mangcha ah article zik ding ah lei hun guat zîak un la chung un kipak thu ka hung gen hi. Kipak um tak hi maleh kei pen tak zia article zik ding ah la dawisaknau ka chan hi kiphatlam um ka sa takzet ahi. Lei dawisaknau gual ah ka hun zik thiamlo tak in le thupha ka chawî masa hihen la.

La bawl zosia te hi a la bawl zîak uh dong ding hita leng a zîak kibang lo lem lum ding in ka gingcha, ken Pathian La ka bawl zîak pen tak hi ahi leh Pathian in ei pawlna thu te haw hi mite a ding ale malsawmna ala hi thei khak leh ti kinepna nei kawm in ka bawl sek ah, chun, la kibawl te haw hi khawvel mun chuam chuam ah um l gîngtu chanpi te na tiang in ala ngaithei uh ahi zîak in gîngtute kisuk hat tua na ding inle a poimaw kasa mama ahi. Alangkhat lam in La bawl hi pilvan ngai mama ahia, gîngtute nun chawmtu poimawtak ahi zîakin Bible Thu tawh kipel deu hiau hiau ah bawl khak le abailam ma ma ahi. Abang chu hitaleh La hung kibawl te haw hi a kai ahem hawî isak zîak ah mawk limpi leh lampi ding ahi pua a bawltu'n zia la mangcha hi bang ahem a gen guat, Bible base ahinam ti haw hi khual chil ma ma ding ahi. Pathian La tamtak te haw hi l ngai ahi chun l gîndan gamgi khel lam hial va kai le a um sek hi.

HINNA VÂK

Nek hawlna zia in hun hi ka nei tawm ma ma sek ah Kum 2019 ah kipat tuni tiang in zia anuai ah te hi ka la bawl te chu ahi:

- 1.Thagau Chawldamna
- 2.Hinna Lallukhuk
- 3.Chuai Ngailo Lal Jesu
- 4.Hukdamna Long

Zia te haw lak ahin **“Chuai Ngailo Lal Jesu”** hi Manipur Area Choir te’n thiam tak in a sau ah Youtube inle a et thei zing ahi. Chun, **“Hinna Lallukhuk”** hi Pi. Vungthiankim in thiam tak in a sa zia hile Youtube ah et leh ngaithei zing ahi. Adang tegel hi ahi leh vang dawigual in recording te a kibawl thei nai tadi puai.

Zia te haw lak ahin tuni hun ahin **“Chuai Ngailo Lal Jesu”** ka hun bawl dan leh a thu hi thei dan dan in vak taklang leu hin ka ut ahi.

Zia la hi Kum 2020 May tha ah ka bawl ahia, Covid-19 hipi

thuthang a khawvel gamtin in a gi veng vung ah, zia hun lai ahin office kai le mu mal bek lo ahi zia in hun lem chang ah la in ka lungthim ah sermon nasa tak ah gi zing chu a La in ka hun bawlta ahi. Zia la hi a thu leh a kai hi kei bawl ahia solfa zil khalo akihi zia in naute hawn ei harmonise piak ua La Pawl in ahung gidawk thei ah ka lung a dam tak zeta hi.

Ni khat hi Shillong ah ka in lua nau varanda ah ka kitung ah covid-19 thuthang chanchinte haw leh khawvel ah siatna nasatak tak tungte haw ka gel gel lai in ka lungthim in dawtna liantak ahung um ta, “Bang zia ah mihingte hi nisin ah nek leh dawn, sil leh chen leh nei leh lam bep buaipi ah hinkhua ki mang zota?” “Khawvel lopina leh hawina haw hi ah um den ding bang a um ah ahem? ti dawtna hi ahi. Zia dawtna ah

kipat hin zia la hi ka hun bawl ta ahi.

Ei Siamtu hemil zen ah mihingte'n Kipakna ding ha hawl ah I hawl uh khawvel hawina leh lopina te hin hun chawmcha bep dai ding ahi Lal Jesu bep hi a chuai ngailo ding kumtuang dai ding um sun chu ahi ti hi zia la mang cha ah ka tak la tut pen chu ahi:

Khawvel hawina leh a lopina hi'n mihing lungthim hi alua dim zo ta, ahinla, bang gual ah hawl in nei maleu hin le chawmlo kal in a chuai zel sek ah, maleh Lal Jesu hi a chuai theilo ding a neitute a ding ah nisin hun sin ah thak deu deu kumtuang tiang ah ni leh tha um taklo nung tiang ah um zing ding um sun chu ahi.

Lal Jesu zuitu te hi I damlai lam suk lam tou zawt nau ahin ngui leh chau ah basam takah I um chang uh um ma leh le, Israelte Mana mang cha nek

ding umlo na ah nek ding pethei tu chun ei uh le A van an in ei chawm in Van Kanan I tun tiang un ei thatham lo ding ahi.

Lal Jesu zuitu te a ding in zia khawvel ah hin kisanpi ding ting bangma a um pua, Kross ah ei tatna zal ah kumtuang thina ah kipat kumtuang hinna I chan uh hi alul pen suan ding ting pen chu ahi.

Zia khawvel ah i hinkhuau chawmcha sumpi hung kilang ah mang kit gual mai hinkhua nei I hui ti kihechian hi a poimaw ma ma ah, zia hun chawm cha I nei sung ua hin ginum tak ah a chuai theilo ding Lal Jesu zuitu I hui chun dan tak leh Zion khawpi ah kumtuang ah leng ding ihui.

SIMTUTE ZOSIA LALPA'N ZIA
LA MANGCHA HIN HUN PAWL
THAK CHIAT TA HEN!

KAP HUANG

Tarik **10th - 12th February, 2023** sung hin Bial chuam chuam ah Kochuam Numei Pawl te'n Bial Kikhawmpì hi Pathian mapuina leh umpina tawh taksa lam leh thagau lam ah lawkna tampi tawh mat ahi.

LAMKA PASTOR BIAL

Amun: Lamka Kochuam Biakim

Thupi: *"Lalpa achun kipak un"* Philippi 4:4

Puitu thak dingte:

1. Chairman - Pu Kh.Thianniang
2. Vice-Chairman - Pi Niangthiam
3. Secretary - Nk.Tingmoikim
4. Asst. Secretary - Pi H N.Sangkim
5. Treasurer - Pi Damjohny
6. Finance Secretary - Pi Nemngaichin



PHAILIANBUNG PASTOR BIAL

Amun: B.Munpi Kochuam Biakin

Thupi : *"Numei pha chu suangmantam"* Thupilte 31:10

Puitu thak dingte:

1. Chairman - Pi Niangsawnei
2. Vice-Chairman - Pi Kimi
3. Secretary - Pi Tinglalk
4. Asst. Secretary - Pi Thianting

5. Treasurer - Pi Niangsawnhawi

6. Finance Secretary - Pi Kimneu



KANGVAI PASTOR BIAL

Amun: Chawlhmunnuam Kochuam Biakin

Thupi: *"Lalpa na chu thanuam takin sem un"* Kolossa 3:23

Puitu thak dingte:

1. Chairman - Pu Lamneingai
2. Vice Chairman - Pi Kholhling
3. Secretary - Pi Nengneithem
4. Asst. Secretary - Pi Niangdoiting
5. Treasurer - Pi Phalhawiniang
6. Fin. Secretary - Pi Niangjoykim



NEW LAMKA PASTOR BIAL

Amun: Bethlehem Kochuam Biakin

Thupi: "A suang tapo in Lalpa chu suang ta'u hen" IKorinth 1:31

Puitu thak dingte:

1. Chairman - Pi Dimtinniang
2. Vice Chairman - Pi Ngaiemmawi
3. Secretary - Pi Chongneu
4. Assy.Secretary - Pi Tingzokim
5. Treasurer - Pi Ngaihat
6. Finance Secretary - Pi Siami



PANGLIAN PASTOR BIAL

Amun: Singngat Kochuam Biakin

Thupi: Ka hinna hin Lalpa a chawihawi hi" Luka 1:47

Puitu thak dingte:

1. Chairman - Pu Lhingjaneng
2. Vice-Chairman - Pi Pauthianting
3. Secretary - Pi Kimneilhing
4. Asst. Secy. - Pi Chingngaihulun
5. Treasurer - Pi Hatneimawi
6. Fin. Secretary -
Pi Chingngailun



S.KAWTLIAN PASTOR BIAL

Amun: V.Kolmun Kochuam Biakin

Thupi: " La puanbuk kek lian in" Isai 54:2

Puitu thak dingte:

1. Chairman - Pi Khupneichin
2. Vice Chairman - Pi Khawla
3. Secretary - Pi Nemsonkim
4. Asst. Secy. - Pi Nianglunching
5. Treasurer - Pi Tingthianniang
6. Fin. Secy. - Pi Tinglemkim



PHAIPHENG PASTOR BIAL

Amun: Phaipheng Kochuam Biakin

Thupi: " Bangkim ah ginum ahi diu ahi" Tim.3:11

Puitu thak dingte:

1. Chairman - Pi Phallamhoi
2. Vice-Chairman - Pi Vungngaihoi
3. Secretary - Pi Kimsawngak

HINNA VÂK

4. Asst. Secy. - Pi Hoisamkim
5. Treasurer- Pi Doingainiang
6. Fin. Secy. - Pi Niangnunmawi



KAWLHEN PASTOR BIAL

Amun: Kawlhen Kochuam Biakin

Thupi: "Pathian ah kisuk hat" / Samuel 30:6

Puitu thak dingte:

1. Chairman - Pi Chawngmawi
2. Vice Chairman - Pi Thiathieng
3. Secretary - Pi Lemkim
4. Asst. Secretary -
Pi Lalawmpui
5. Treasurer - Pi Chawinu
6. Finance Secretary - Pi Neneu



MUNPI PASTOR BIAL

Amun: Chawngkhawzo
Kochuam Biakin

Thupi: "Zia te sangin kei lei hepi
zaw em?" Johan 21:15

Puitu thak dingte:

1. Chairman - Pi Chiching
2. Vice Chairman - Pi Kimmoi
3. Secretary - Pi Sennu
4. Asst. Secretary - Pi Lemting
5. Treasurer - Pi Hohoi
6. Fin. Secretary - Pi Hoithian



LEILON PASTOR BIAL

Amun: L.Munlai Kochuam Biakin

Thupi: "Hepina leh Nasep pha
ah kitil hat tua in kikhawk sak
tua chiat hitiu" Hebrai 10:24

Puitu thak dingte:

1. Chairman- Pi Nemdawikim
2. Vice Chairman - Pi Kimneithiam
3. Secretary - Pi Chinngailian
4. Asst. Secretary - Pi Nagnhu
5. Treasurer - Pi Hoilianmawi
6. Fin. Secy. - Pi Nengpichong



KKP HUANG

Vaihawm Kikhawp na zintuntu vethak na :

KKP Vaihawm Kikhawp 7 veina zintuntu Phailianbung Bial chu CKKP O/B ten ni 3rd February, 2023 in vethak na a nei ui. Vaihawm Kikhawp Organizing Committee te taw Phailianbung Pastor Quarters ah 3rd February, 2023 zan dak 7PM kipat in Vaihawm Kikhawp kisingsak na te genkhawm a hin, Organizing Committee te panlak na lungdam um a ki sai.

Zia hun a hin Phailianbung Bial ten CKKP O/B te nek leh chak tui tak leh zintun na lam in kiphal tak ah pan alak ziak un kipak um a sau hi.



CKKP Documentary Film Sub-Committee Report :

Rev. Thangkai - Rev. Lungpau Documentary Film siam ding KKP General Conference 12 veina lemsak dungzui in avai sai ding Sub-Committee siam a hi. Zia Sub-Committee te chun zia gual hin pan ala to ui.

Film shooting hi 9th – 10th November, 2022 in Lamka Area nei a hi. Zia chun Drone leh Video Camera te mangcha bawl a hi.

Zia zaw a chun ni 15th – 16th February, 2023 in Tanggam (Phaipheng Bial) lam in Video shooting nei a hi. Ni 17th February, 2023 in Lamka Area Drone mangchan Video Shooting nei kit a hi. Documentary Film hi Editing leh Sound Dubbing leh Track te siam nailo a hi.



HINNA VÂK

Provisional Synod Choir te kimatchakna :

1. 75th Zomi Namni 2023 :

Ni 18th February, 2023 Kiginni nitak in Zomi Namni a ding kisingsakna Gangpimual Kochuam Hall ah La zil ua, La zil na Gangpimual KKP ten refreshment tui tak a bawl piak ui.

19th February, 2023 in EBCC Centenary Hall ah Zomi Nam Ni a ding Joint Choir Rehearsal na a pang thei ui. Ni 20th February, 2023 Zomi Nam Ni matna Joint Choir ah Pathian Pakna La “Hallelujah Chorus” leh “Joy to the World” sakna a

pang thei ui. Chun, Organizing Committee kipat in kipak man in `10, 000/- a dawn ui. Chuleh kuan leh tun hun in Synod Office ah pauchapna a nei ui.

2. Awl-lên Festival 2023 :

Awl-lên Festival 2023 in Tangphai Pro-Synod Choir te Organizing Committee in Pathian Pakna La sa ding in a hung chial ui. Tangphai Choir te'n le chial a hi gual un ni 27th February, 2023 Sun Programme hun in la asa thei ui. Awllen Organizing Committtee apat in ` 2, 000/- le kipakpi na a dawng ui.



TANGPHAI PRESBYTERIAN CHURCH
(Presbyterian Church of India)
PROVISIONAL SYNOD
KHRISTIAN KHANGLAI PAWL VAIHAWM KIKHAWP 7 – VEINA
~2023~

A mun: Phailianbung Kochuam Biakin, Phailianbung Pastor Bial

A hun: 10th – 12th March, 2023

Thupi: *“La hinnau humbitna ding in taidawk un” - Thilsiam Thu 19: 17*

Puitute

Leader	:	Rev. Lalpiaklian
Asst. Leader	:	Pu Mangzalun
General Secretary	:	Upa Genminlun
Asst. Secretary	:	Tv. Thangmohan
Treasurer	:	Nk. Nemlalthuam
Finance Secretary	:	Tv. Sutminthang

HINNA VÂK

10th March, 2023 (Simhaini)

6: 00 PM – PALAI LAWPNAL LEH

BIAKNA KIKHAWP

Puitu : Rev. Lalpiaklian,
Leader CKKP

Pantu : Munpi Bial

Report : General Secretary

Khaikhawm

Lapawl : 1. D. Khawzim Bial
2. Phaipheng Bial

Thugentu : Rev. Th. Samuel
i/c Phaipheng Bial

Kumpulan :

Bu hawwna Rev. Ngurthanmawia Sailo
Moderator TPCPS

VARIETY PROGRAMME

Puitu : Tv. Nenglalsang
Committee Member

Solo : 1. B. Phainuam Bial
2. Sugnu Bial
3. Kangvai Bial

Quartet : 1. D. Phailian Bial
2. Mata Bial

Kumpulan : Rev. Summinlian Vaiphei
i/c Sugnu Bial

Thuchawm : P/PGenlemthang Suantak
Mata Bial

11th March, 2023 (Kiginni)

10: 00 AM – 3: 30 PM:

VAIHAWMNA

6: 00 PM – PATHIAN BIAKNA KIKHAWP

Puitu : Pu Lamjoylian
Committee Member

Pantu : Kawlhen Bial

Lapawl : 1. Synod Choir
2. Munpi Pastor Bial

Thugentu : Rev. Andrew LR Khiangte
i/c Mata Bial

VARIETY PROGRAMME

Puitu : Tv. Ginlalsiam
Committee member

Solo : 1. K. Sharonphai Bial
2. Jiribam Bial
3. Guwahati Branch

Quartet : 1. Kawlhen Bial
2. Imphal Bial

Thuchawm : P/P C. Kailianson
Imphal Bial

12th March, 2023 (Pathianni)

11: 00 AM – PATHIAN BIAKNA

KIKHAWP

- Puitu : Tv. Sutminthang
Fin. Secretary
- Pantu : Chingmei Bial
- Lapawl : 1. Synod Choir
2. New Lamka Bial
3. S. Munnuam Bial
- Thupi gentu : Rev. P.B. Zosaphara
Consultant
- Thupi : “*La hinnau humbitna
ding in taidawk un*”
- Thilpiak : CKKP a ding
- Lakkhawm

01: 30 PM – VARIETY

PROGRAMME

- Puitu : Tv. K. William
Committee Member
- Solo : 1. D. Phailian Bial
2. Panglian Bial
- Seminar : “*KKP leh Pathian
thilsiamte*”
- Resource : Pi Hoibetty, *Principal*
Person VK Tawna High

12th March, 2023 (Pathianni Zan)

06: 00 PM – PATHIAN BIAKNA

KIKHAWP

- Puitu : Pu Mangzalun
Asst. Leader
- Lapawl : 1. Synod Choir
2. S. Kawtlian Bial
3. Phailianbung Bial
- Thugentu : Rev. S. Lama Vaiphei
Executive Secretary
- Thilpiak : Zintuntute a ding
- Lakkhawm

VARIETY PROGRAMME

- Puitu : Nk. Florence C. Moite
Committee Member
- Solo : 1. Leijangphai Bial
2. Dumlian Bial
3. Delhi Branch
- Quartet : 1. Lamka Bial
2. Leilon Bial
- Thuchawm : P/P Minthianboi
D. Phailian Bial